

Нахуро қизлари Сора (биринчи мақола)



17:00 / 28.10.2020 5794

Саййидати Соранинг (Аллоҳ у зотдан рози бўлсин) жуфти ҳалоллари анбиёларнинг улуғи Иброҳим алайҳиссаломдирлар. Сора ягона Аллоҳга иймон келтириб, жуфтлари билан Фаластинга ҳижрат қилганлар, кейин Мисрга кетганлар. Миср подшоҳи у аёлга тажовуз қилди, лекин Аллоҳ Сорани асради ва подшоҳ бир жория ҳадя қилди.

Ҳазрати Сора туғмаган эдилар, зеро кексайганларида Аллоҳ таоло у зотга фарзанд неъматини беришни хоҳлади. Фаришталар бу ҳақда хушхабар етказдилар. Бўйларида бўлиб, Аллоҳнинг набийси бўлмиш Ишоқ алайҳиссаломни туғдилар.

Ҳазрати Сора умрларининг охиригача Фаластинда турмуш ўртоқлари Иброҳим алайҳиссалом ва ўғиллари Ишоқ алайҳиссалом билан яшадилар. Шу ерда вафот этиб, Халил шаҳарига дафн этилдилар.

Сора мўмина, содиқа, покиза аёл эдилар.

Ҳазрати Соранинг иймонлари

Ҳазрати Сора Ироқнинг Бобил шаҳрида дунёга келдилар. Ниҳоятда кўркам ва чиройли эдилар. Ахлоқлари ҳам гўзал бўлиб вояга етдилар. Ўта покизаликлари, ахлоқ ва одобларининг гўзаллиги билан оламга машҳур бўлдилар. Балоғатга етгач, амакиларининг ўғли Иброҳим Озор ўғлига турмушга чиқдилар. Улар бахтиёр, ширин турмуш қуриб яшашди. Ўша замонларда ҳеч ким ягона Аллоҳга ибодат қилмас, мушриклар ҳар хил бут-санамларга топинишарди. Озор бут ясаб, сотарди. Баъзилар юлдузларга сиғинишарди. Шулардан бири шаҳарнинг молики Намруд эди.

Ягона Аллоҳга ибодат қилиш, пок эътиқодга эргашишни Аллоҳ Иброҳим алайҳиссаломга насиб этди. Инсонларга Исломни етказиш учун Аллоҳ таоло Иброҳим алайҳиссаломни танлади ва уни ҳидоят қилди. Ул зот ўз қавмини ягона Аллоҳга ибодат қилишга, бут-санам ва бошқа нарсаларга топинмасликка даъват эта бошладилар. Даъватни ўзларининг қариндошларидан бошладилар. Аёллари Сора ва акаларининг ўғли Лутасдан бошқа ҳеч ким Иброҳим алайҳиссаломга эргашмади, аксинча уни ёлғончига чиқаришди, даъватларига қарши боришди. У зот билан талашиб-тортишишди, ўтга отишди, лекин Аллоҳ таоло у зотни балолардан асради.

Кунлардан бир кун Намруд даъват йўлини тўсиш учун Иброҳим алайҳиссалом билан Раббиси ҳақида баҳслашишга чақирди. Аллоҳ таоло Иброҳим алайҳиссаломга илоҳий ҳужжат бериб, Намрудни ёлғончига чиқарди. Сора онамиз эрларининг ёнларида ҳамдарад бўлиб, Аллоҳнинг динига ёрдам бердилар.

Соранинг ҳижратлари

Бир қанча муддат Ҳазрати Сора жуфти ҳалоллари ва жиянлари Лут билан Ироқда яшадилар. Лекин қавм Иброҳим алайҳиссаломнинг даъватларини йўққа чиқариб, ўзларига озор бера бошлади. Иброҳим алайҳиссалом оилалари билан бошқа ерга кўчишни ва даъватни ўша жойда давом эттиришни истадилар. Аллоҳ таоло ваҳий қилиб, аҳллари билан Фаластинга кўчишни амр этди. У ерни муборак ер, деб хабар қилди.

Ҳазрати Сора турмуш ўртоқлари ва жиянлари билан Фаластинга келдилар. Бу ер муборак жой ва яхшиликларга мўл эди. Фаластинда бир қанча замон туришди. Бу ерда Иброҳим алайҳиссалом инсонларни ягона Аллоҳ таолога

ибодатда бўлишга, ҳақ динга эътиқод қилишга даъват эта бошладилар.

Бир қанча вақтдан кейин шаҳарни қаҳатчилик олди. Ёмғир ёғмай, ерлар қуриди, деҳқончиликда ҳосил унмади, ҳайвонлар қирилди, гўё бу ерда илгари ҳаёт бўлмаганидек ҳолга келди. Иброҳим алайҳиссаломга Аллоҳ таоло ваҳий юбориб, бошқа маконга кўчишни амр қилди. Бу ерда катта Нил дарёси оқарди. У шундай дарё эдики, Аллоҳнинг амри билан унинг суви сасимасди.

Иброҳим алайҳиссаломни иккинчи марта қилган ҳижратлари Мисрга бўлганди. Сора онамиз жуфтлари ва жиянлари билан Мисрга кетдилар.

(Давоми бор)

«Мўминалар силсиласи» китобидан